

嘯古堂詩集

嘯古堂詩集卷四

寶山蔣敦復純甫著

長洲王 韜攷園彙

將歸里門別廉泉師

登樓纔罷理行裝何處西風覓稻梁
秋令白蘋鷗在水天低紅樹雁呼霜
功名遲暮悲親老鄉里蕭條逼歲荒
公亦淮陽勞久臥一官萬里尙空囊

重有別

關河草草結綿綿縱不銷魂已可憐
病後芙蓉愁見影秋來楊柳怕成煙
銀燈黯淡將離酒金縷飄零未嫁年
第一祝卿休望遠隔江衰草正黏天

靖江道中

煙淡夕陽幽西風冷客舟亂山隔江走寒水背成流樹色歸禽
語人家古驛秋濁醪沾未得今夜僕夫愁

渡江

晨雞登樹蟀在牀手持襖被天滿霜秋潮昨夜枕邊落一江白
月煙茫茫檣竿風迅催人渡沙灘不許眠鷗鷺垂楊搖夢草黏
天峭帆又指江南路

蘭陵道中

誰識天涯倦客身絲絲綠鬢旣征塵扁舟今夜蘭陵雨怕有愁
鐙病起人

陽羨弔陳其年檢討

曠世風流絕妙詞青衫紅袖寫烏絲空愁鸚鵡黃江夏忍聽琵琶杜牧之北海遺孤名士淚南朝春夢黨人碑辟疆老去雲郎在惆悵中年玉筵枝

蘭陵花

無錫孝女楊氏親老不嫁製刮絨花售之以供朝夕聞者哀之

蘭陵花誰家女兒鬢上雅花心如鐵顏如雪一縷紅絨一絲血昔有孝女兮婉孌而斯飢堂前白頭兮悲無依朝易菽兮暮易綿織十指兮如柔荑天寒袖短啼烏夜陌上春風花不嫁

芙蓉湖上作

一帆鷗際飛涼煙白縷縷萍末浪花散作衣上雨不見涉江

江人芙蓉渺秋浦

舟泊閩門

青山如夢隱參差柔櫓聲中玉遂遲
一夜西風吹鬢短金昌亭
外柳絲絲

晚步虎邱

涼月何團團照此暮山色一聲畫舸來
絃管盪柔魄轉從市背
遊山靈道前策經壇石氣青秋潭劍花白
廢塚生寒煙美人在
疇昔拂衣還復行華鐙滿街陌舉手謝吳儂
我是吹簫客

舟行過寶帶橋望太湖中諸山用太白江上望皖公山韻
出郭亦太好湖空納山氣船頭青芙蓉飛來解人意恨不攜釣
簑煙波是饒味會探古洞天書讀靈威異茫茫帶水橫鷗盟竟

未遂轉權入蘆花明月白于地

夜泊泖湖弔明殉節吳主事

朝發蘇州城夕宿泖湖口打頭黃葉多西風水楊柳白馬夜灣
來恐有子胥走慨念古頑民坐抗王師久智短忠則長足愧貳
臣某酌酒忽高歌九峰小培塿

胡眉亭堅爲余作大江秋艇圖用東坡書王定國所藏煙

江疊嶂圖韻題之

天下奇絕惟江山精靈萬古生雲煙胸中那得無塊墨澆酒百
斗未豁然不如扁舟散髮弄秋月腰間更跨雙龍泉海水一杯
青九點峨眉直上緣西川胡爲側身天地苦偏仄高歌行路爾
來前今年歸自大江北倦遊挂席浮吳天長風鼓浪任縱送遠

山橫黛爭媚妍孤鴻蕭蕭響柔櫓一鷺漠漠飛平田沈沙折戟
浪淘盡江山憑弔呼長年旁人笑我風塵面煩君寫出頗嬋娟
滬濱城南好秋色貰酒同作黃鸝眠君不見赤壁磯頭蘇玉局
采石江中李謫仙兩人寂寞已千載而我或者前身緣看君長
江萬里之圖畫寫我漁舟一葉之詩篇

感事四首

鸞飄鳳泊爲誰來閒讀離騷數舉杯但負狂名都下策便修頌
福亦仙才鷺花陳述三生感金粉文章七字哀酒罷不妨歌斫
地蔗枝低舞燭光回

野蠶情緒太纏綿婆夢空譚到枕邊國子先生進學解桑園賓
客著書年誰憐江左無雙士早讀南華第二篇慧業未除才語

甚焚香到四禪天

渺渺予懷問蹇修
萍花飛夢大江流
華堂紅粉燈飄雨
孤淚青衫客散愁
事有難言誰竟諒
情還多累不如休
傷心莫問羅敷曲
千騎東方在上頭

長鍊歸來一短瓢
空山何處覓圓焦
琴無綠綺鴟鴞冷
臺有黃金馬骨銷
佳俠含光禪榻病
英雄光武酒杯澆
名心澹似閒鷗鷺
付與寒江日暮潮

仲貽見余近事以詩來慰次韻報之

小謫青天怨玉卮
風花雲葉各參差
弓蛇幻影卿難解
槐蟻前身我亦癡
按劍客沈和氏璧
憐才鬼唱鮑家詩
廣陵散盡知音少
且把山陽遂一枝

春夜坐雨

唱罷瀟瀟又惱公黃昏心緒亂愁中曲拋紅豆三更雨花落青
棠一窻風舊鬼淚啼寒食近離人魂斷畫簾空丁冬怕是琵琶
語冷對蘭釭翦玉蟲

清明日作

鬼聲四面來夕煙慘墟墓風吹白紙灰雨落青楊樹野花紅斷
腸土蘚碧寒霧陟彼歌龍虵脊茲竄狐兔生客三千人死隴五
十步寄語泉下魂此事卿本誤

蒿燈曲

蒿燈夜出華燈酒食顧而曰嘻此一鬼國
蒿燈夜歸枯鴉不飛草頭索索風吹紙衣

書孫中丞元化家傳後

雷聲匄匄足下起登撫之寃可知矣封疆失守大臣辱臣罪當
誅在西市臣居邊防二十年鍊金出火生風煙兵驕將懦大敵
至擐甲立馬關門前國事紛紛坐棋局已失東江議恢復上疏
流涕一再辭不用臣謀臣力蹙倉卒難收將士心忠孝豈是家
門福阿父家居嘆白頭扶攜幼子辦同仇賊中不死歸司敗可
惜殘棋劫未收海飛從此全遼失後十餘年明社沒嗚呼烈皇
用人多不終不用所長用所細

讀離騷樂府

爲左徒

彼狡童麥秀謠黍離稷之苗歌有思作離騷胡爲乎離騷爲

楚懷王左徒匪作離騷爲左徒吁嗟乎左徒

一草藁

既生上官大夫何生三閭大夫大夫之才絕世無大夫之罪由庸奴大夫見事惜不早大夫安用一草藁

楚絕齊

商於之地六百里詭楚絕齊齊絕矣如秦受地秦弗與一戰屈句虜再戰唐昧死與王約六里且與王爲戲王安能取函谷關前一丸泥他日秦滅楚今日楚絕齊

鄭袖寵

美男破老美女破舌鄭袖寵懷王惑靳尙出張儀釋臣安在在齊國囚安在在秦國

蘭勸王

生男勿生幼娶婦但娶醜先笑後號咷乃寇匪婚媾送君南浦
楚天低香草萋萋觀馬蹄一去笑人歸不得鴉鵲啼罷鷓鴣啼

九歌哀

信鬼不信人事巫如事神東皇太乙何所尊山鬼哀怨啼江濱
君不見石言于晉神降莘鈞天廣樂帝賜秦

作天問

江頭古廟吞聲哭走筆龍蛇風滿屋擲破鴻荒去問天慘澹文
章鬼燐綠天若能言天亦愁玉貌一醉低雙眸十二萬年不開
口後世復有柳柳州

詹尹卜

昂昂千里駒泛泛水中鳥
騏驥與抗輓雞鶩焉爭食
黃鐘毀棄瓦釜鳴蟬翼爲重
千鈞輕用君之志行君意龜
策不能知此事

沈汨羅

一唱哀江南竹枝暮筇啼空潭
再唱公無渡月黑楓青斷行路
湘水迢迢魚腹多白日不照當
奈何公乎淹忽徒自苦楚宮昨
夜細腹舞

漁父辭

滄浪之水清滄浪之水濁濯吾纓
濯吾足彼漁父者古之隱君子也

作讀離騷樂府後將合之神石酌酒靈均之靈而告之

絮酒商量醉一卮夫君惆悵獨醒時
山河故郢無人物雲雨高

唐有夢思香草前身都命薄文章小雅此才奇刪詩可惜秦風
在獨向天南寫楚辭

後感事四首疊前韻

高歌樂府野鷹來海水蒼茫酌一杯天壤卽今猶落魄江山從
古不宜才芙蓉北渚佳人怨苜蓿西風病馬哀夢握龍韜建奇
策燕然萬里勒功回

小樓一夜雨綿綿春在重簾淺夢邊生不同時楊狗監聽如此
曲李龜年謾書枉著三千檣怨瑟空彈廿五篇莫問通天臺下
客青衫憔悴欲箋天

稜稜仙骨幾生修肯放梅花第二流學佛願除才子習讀書先
替古人愁名心未死千秋在綺恨難銷一哭休故態狂奴應改

否仰天笑指鏡中頭

行吟海上負詩瓢
琴語誰知尾半焦
墜地名花春不管
生天慧業劫難銷
青山黯黯無人主
絳塲明明有淚澆
可惜當時枚乘筆
長楊不賦賦觀潮

元人有十臺懷古詩續之得十首

會盟臺

請君擊缶太匆匆
牛耳登壇指顧中
趙璧自完天下寶
秦聲直起大王雄
冠裳已變桓文局
將相徒爭廉藺功
他日長平聞鬼哭
澠池杯酒總成空

白登臺

大風歌罷白登來
老去如聞勅勒哀
狗兔盡銷猛士氣
江山合

用美人才一從秘計三邊出無復雄心萬里開莫爲橫行斬樊
噲漢家遺恨滿蒿萊

子陵臺

淮陰亦有王孫蹟誰是先生得自由一卧不知天子腹再來難
覓故人裴風雲劍履歸諸將江海星辰在釣舟愁擊西山竹如
意魂飛朱鳥夕陽幽

呼鷹臺

呼鷹臺畔賸斜曛樂府清商不可聞名士畫來同一餅此州天
下竟三分祗餘豚犬看兒輩惜未英雄共使君枉說將軍能好
客淒涼鸚鵡弔遺文

賦詩臺

五官文士意從容立馬湖山感慨中
弱弟傷心甄女賦乃翁橫
槩大江東一家詞客黃初盡
三度旌旗白下空天塹古來飛渡
少徐方築室幾成功

冰井臺

石趙高齊兩劫灰香姜片瓦出莓苔
馬牛風走降王傳龍虎天生亂世才
父老神州空隕涕英雄鄴下幾登臺
總帷寂寞分香冷銅雀興亡更可哀

雨花臺

蕭梁宮闕問蟲沙長老從今說法差
香火緣深啼餓鬼帝王家
破落空花三生惡業銷雌蜺一部名
經唱亂蛙浩劫長江流不盡秣陵秋
老角聲斜

吳公臺

亡國風流轉眼來，頭顱莫便鏡中猜。
兩朝好色真才子，一夢成灰舊將臺。
辱非未填黃土恨，後宮空向白登哀。
祗消占住揚州月，何事天涯錦纜開。

靈武臺

蜀道淋鈴夜雨聲，唐家再造此經營。
立君事大春秋義，受禪辭哀父子情。
行在麻鞵來杜甫，中興碑板有真卿。
胡盧南宋仍依樣，雪窖淒涼五國城。

禮斗臺

難忘皇覺舊袈裟，一炬河山一刹那。
叔父此來真不易，大師於意更云何。
真龍迹江湖遠，病虎參禪劫運多。
留得蒲團遺迹

在從亡野錄未全訛

書明太保毛文龍傳後

殺曲端者張魏公苻離一敗功名終殺文龍者袁崇煥督師橫
血橐街紅曲端之殺殺有罪將才尙惜成菹醢文龍之殺殺無
名安用軍中置朱亥有明末造事可憂連兵糜餉無時休寧前
邊防本騎脊朝鮮要害當扼喉樓船將軍下海道入險出險據
皮島十萬旌旗一面雄北門砥爲朝廷保朝廷轉餉屢失時上
疏涕淚橫交頤一朝壯士怒脫幘臣雖萬死安足辭將軍之功
己不賞將軍之頸得無痒督師蟒玉受專征貝錦先行太鹵莽
愁雲漫漫海上生將星墜地樞馬驚國家大事會須議豈有譚
笑能興兵寺門耳語面發赤還汝歐刀一當百倉皇拜詔復何

言如此江山浪花擲哭聲震天天晝昏將士解體皆北奔毒龍
挾舟棺不動陰飈慘淡歸忠魂嗚呼庸臣贖贖肆詆訾若輩富
貴保妻子督師亦負經濟才長城自壞知何意當時此舉若不
成叛將安得揚帆行麤疎更過熊廷弼駕馭翻輸王化貞吁嗟
乎今年殺島帥全遼斷左臂明年殺督師監軍用宦寺政刑前
後盡倒置從此可知天下事

寓齋題壁

蕭蕭寒雁下橫塘酒醒關河玉篴涼獨與離人訴搖落西風殘
柳古斜陽

禪榻疏寮倚鬢絲秋鐙此夕最涼時十年夜雨江湖客愁聽吳
娘唱竹枝

題南宋人畫冊

院本丹青筆底妍
幾枝零落寫寒煙
月明殘雪孤山外
目斷西湖一角天

馬遠梅花

舜齋居士太憨生
南宋湖山畫不成
祇好一花兼一葉
水仙祠下暮潮平

趙子固水仙

畫史宮中愛小娃
櫻桃微雨碧籠紗
何如剡鞞香塔下
金縷鞵邊蘸露華

楊妹子櫻桃

峭寒扶袖病黃昏
蔞縹殘有淚痕
可惜王孫不歸去
夫妻賣盡閉柴門

管仲姬竹

奉懷江子香夫子

風雨不相見
名山未報恩
文章期後世
憂患託師門
綠鬢愁千

斛黃花酒一尊平生知己感獨立此乾坤

海上秋興

對酒蒼茫不可歌天涯物候近如何高城鼓角三更動大海風
濤七月多健鶻當空盤朔漠飛鴻入夜滿關河側身太息今寥
落十載青霜一劍磨

江上秋煙渺獨尋西風渺渺動微音幽蘭已悔當門種病馬仍
懷出塞心水際碧雲孤棹遠天邊紅樹夕陽深所思不見空惆
悵日暮還爲梁甫吟

來夢亭話雨圖

沈夢塘先生客閩時陸萊莊太守爲閩令築亭居之顏
曰來夢繪圖紀事先生首唱四詩太守及諸名流題和

殆徧洵佳話也今先生已歸道山令子生甫仲貽出是
圖屬題爰次其韻不知涕泗之何從云

天涯舊路碎秋萍腸斷江城話雨亭歸夢已催墳草碧倦遊重
認客衫青春風吳苑櫻桃閣明月揚州芍藥廳記得閒鷗曾小
住越王臺下一詩星

寥寥官鼓聽誰能一榻吳棉換蜀綾送客綠波山店酒題詩黃
葉寺門僧春人讀曲閒尋夢夜雨修書冷翦燈來夢風流比來
仲渭南感逝料難勝

秋風秋雨太惺忪才隔黃壚已萬重官閣荒涼吟荔子仙城飄
渺署芙蓉名山易盡人間字禪榻難聽水上鐘多少煙雲成過
眼楊花春盡雪花冬

畫幃飄零有所思
纓桐心事幾人知
碧蘭紅杜招魂遠
白展青山醉酒遲
身後鶯花彈別淚
螿頭金石費官貲
愁同阿買聽殘雨
又是西窗燭黯時

書明閻典史傳後

城下兵二十四萬
城中守八十一日
城不及三里
五六萬人同日死
身是明朝一典史
典史官不直錢一文
亦不願作降將軍
呼軍卒與語
好男子我輩血肉當爲敵
食分敵食吾肉不忍食
吾血天可裂地可坼
川可竭石可勒
此血淋漓不可滅
軍中樂府轉五更
聞遂彷彿睢陽城
諸生許德用製五更轉曲令軍士歌以巡城
一更初傳箭號令如山
兵不變二更鼓角鳴壯士提刀夜斫營
三更四更刁斗動鬼神
風雨聲聲痛五更
月黑天雨霜頭顱冷
擲馬上郎

吁嗟乎北都沈南都沒長江飛渡長淮失區區獨此一丸泥典
史死耳何足惜同典史死官亦匹謂陳公明辨彼主兵者執手泣原
是先朝廣昌伯

讀史絕句

生爲匈奴長死作猗尼壻淵耀盡灰土此兒大可語
排牆殺王衍老拳鮑卒陽如聞鼓鞞聲石公眞堂堂
得姓步搖冠開國紫濛邑爲報陶侃書殊自失臣節
蒲氏起關中志不爲人下一上愁思堆吾思桓司馬
淮淝兵八千福德復在燕冠軍作龍驤必不戮苻堅
老羌橫大矛上馬徑殺賊兒頑鞭三百何不忠王室
德人據三臺卞世僅及子彼慕容超者尸居餘氣耳

赫連亦作賊高登燭臺人命賤如狗知非命世才
涼州心胥室思歸宜陽老獨活不得活乃作寄生草
長驅登劔閣顧盼羞庸才如何流離後終奉降牋來
置酒龜茲宮蒲桃美十斛得鼎姑滅城天子告廟哭
苻秦敗壽春乞伏叛隴右不救金城亡空納禿髮婦
江西鮮卑兒克有廣武都興學勸農桑美哉利鹿孤
騮馬生白駒十八子當王數寄生不侯可惜獫狁將
血祭蘭門山殺兄滅人國何物段將軍妍皮裹癡骨
和龍復和龍前慕容後焉必欲自爲帝何生夕陽公

題張睢陽廟壁

倉皇鼙鼓九州塵殺賊無成誓殺身百戰沙蟲皆厲鬼一城鼠

雀亦忠臣橫吹鐵遂風雲壯再造金甌日月新從古艱難論天
道生來原未識人倫

長歌一首奉懷廉泉師

去年客唱江南曲側身江北羈秋翼今年臥病江南春卻恨浮
雲阻江北人生自古多別離天下何況知音希江湖滿地遇殢
繳安得飛鳥常相依往時范萊蕪作宰來吾婁賤子正年少獻
詩堂下趨先生愛我置坐隅謂我不合長菰蘆千金散盡不得
意男兒到此除豪氣直挂西風八尺帆過江便是吹簫地官齋
相見復相憐一領青衫負十年已經射策藺成誤尚許傳經鄭
氏箋西園賓從陪文譙東閣梅花攜鐵硯對客頻誇弟子才論
詩每得看人羨就中吳質最風流

吳梅孫

更有元龍百尺樓

陳

雜

明月泥人吹玉盞青鏡繡佛挂吳鉤雉謀春草城南路杯

酒親澆冢家墓一曲吳孃換別愁暮雨瀟瀟隔江樹此時意氣
如雷顛此日狂名滿酒邊誰知青眼高歌地又是黃楊厄閨天
布衣草屨還鄉井肯望車塵學造請刮目何須問呂蒙譚兵早
已經王猛上書謾罵欲何求
莫逢官長愁身世空山頻別
足文章矮屋一低頭生不英雄便宜死碌碌那得長如此腰間
尚有玉鹿盧報恩忽憶風胡子岸柳江花昔送行師門回首不
勝情吳淞夜雨青琴老彈盡天風海水聲

題沈小湘

文淵

友蘭別墅圖次原韻

小闢情天住禹餘雲階月地結清廬詩題才子金荃集人在墟
城玉女居此境俗塵應自遠今生綺習不須除雙修更種神仙

福三百梅花月一鋤

雙弓十笏拓尋常，擬賦藍田崔氏莊。
補竹清陰憐月瘦，畫落高樹得雲涼。
觴飛銀燭，筵初語花護金鈴。風莫狂，隔著曲屏棋局響，疏簾清簟日初長。

自拈麈尾拂塵襟，霏屑清言入竹林。
世外桐僊高士伴，山中蘭夢美人春。
寒半臂添衣坐，詩好雙鬟畫壁吟。
一種風情誰會得，七條絃子聽餘音。

羅陽風雅好支持，初日年華發妙思。
芍藥題牋春事早，葡萄讀曲酒醒遲。
青來水閣鄰巖首，墅前陳君問渠後圃紅樹斜陽費大癡。
錢丈拜石補花木祝君勤位，置處光暢好是芳時。

嘯古堂詩集卷四終

子同寅伯威甫敬校

賜讀大箸氣節凜然佩服之至容日奉訪先此道意 綺縵縣

麗之才橫逸雄豪之氣世有賞音是惟健者石甫姚瑩

純甫通人足下素無交接之雅承以新舊詩四冊見示又辱詢
誶事之曲折此非鄙人所克任也少壯時雖謬馳走海內今久
悔之而又衰病杜門不與海內賢士大夫相接實無以副盛意
然辭旨之厚又不可無以報夫詩文之爲技小矣然旣爲之則
又有難焉者大抵才與氣受之於天然又貴有以養其才氣者
足下之受於天者厚矣觀其格律氣味沈雄雅健吾家石甫所
言已當蒙所微不足者轉於前輩相似處多耳山谷云文章當
追配古人不以賢於流俗而自足此言真足爲吾輩藥石竊意
足下胸中所蓄當不止此必有以自進於古然後爲不虛造物

生才之意若夫世俗浮名固不足爲有志者進也恐行李急發
草致數語知無當大雅秋暑尙酷諸惟保護自愛姚椿頓首
葉生來盛道見推之意竝悉足下行止顛末歎惋久之卽夜復
讀大箸所云與前輩相似處多者初刻四卷中有之至第五六
卷憤時感遇思愛之忱溢於言表此詩人真性情也弟七八卷
時而驚才絕豔時而沈鬱蒼涼天分學力已臻絕詣貴鄉生甫
已矣君其代興姚椿

啟函香凝陵紙怪發其才瑰偉而佚麗其思幼眇而纏緜英絕
領袖後來之彥千秋盛業吾子勉之願性老人阮元

天下清才多奇才少 劍人先生奇才也七古縱橫變化震盪
大地光采陸離不可逼視小詩近體復極清豔芬芳之致洪稚

存太史自評其詩劍氣七分吾於先生亦云沈裕本

劍人後四卷詩爲咸豐乙卯年所刊亦由友人醜貲助剞劂費
板藏蘿溪陳氏當時刷印甚少世罕見之聞遭兵燹已付劫灰
其詩慷慨激昂沈雄鬱勃有把杯問天拔劍斫地之概至其感
懷時事悲憫天人抒憤言愁長歌當哭杜陵詩史夫何愧焉每
讀一過輒浮一大白近日詩人殆未見其比劍人才既奇特性
亦兀傲往往負氣不下人多所凌折少游維揚繼客如皋多以
狂名著酒酣耳熱輒作灌夫罵座坐是落魄江淮間奇窮復罹
奇禍以至削髮逃方外及返初服舉博士弟子員豪氣已滅然
貧困益甚文人之厄言之可悲至低首下心傭書西舌則彼蒼
之所以待才人者蓋可知已劍人負經濟大志好談兵事前後

上書當道多不見用晚年以上萬言書得一席地有名爲知君者告人曰吾特借筆墨之役羈縻之耳否則恐其南走胡北走越也嗚呼此稟傑之士所由灰心而扼腕者也與余交十年如一日折衷文字無所不言每勸余當力爲可傳之學今竄迹荒陬索居獨處更闕燈炮追憶舊游恍如夢寐感知遇之無人慚學殖之益落負我良友不禁淚爲之潑潑墮也同治二年癸亥浴佛日天南遞叟王翰无晦氏識於香海寓齋

嘯古堂詩集卷五

寶山蔣敦復純甫著

長洲王韜子潛彙

庚子春感

藥闌人去畫愔愔檐馬聲中碎玉琴春夢澹于蝴蝶影落花寒
入杜鵑心空愁海上無青鳥不見天涯有綠陰日暮孤吟託梁
父么啞誰爲識微音

芙蓉謠

芙蓉花開好顏色夜夜秋霜化爲白芙蓉花落嫣紅死斷送一
鐙魂入紙花落花開奈爾何天涯無處不風波花長顏色人長
命可那鄰家鴛鴦多

贈富山人

攜盃飄然出茫茫天地身西風雙客鬢秋草一詩人余亦傷心者江湖多苦辛狂歌來酒市劍氣合龍津

題品劍圖

前年與君說劍時雌雄霹靂雙虹起今日題君品劍圖閉戶讀書而已矣是時海上方用兵長槍大戟徒縱橫男兒要立忠孝事拔劍與之俱死生眼中之鐵心中血鐵厚一寸血一石若將熱血灑冷鐵百丈光芒并力出美人膽小紅鴛鴦壯士身經繡兩當書生好客亦好色躍馬同經古戰場

常州周伯恬孝廉丈

儀陣

自涇縣寄題拙集有滄海日輪

光五色及忽見中宵虎氣騰之句感此報謝用彭甘亭

答舒鐵雲題遊山卷子詩韻

男兒讀書破萬卷富貴神仙安足戀小五嶽收眼界寬大九州
踏芒屨徧不盡蒼茫萬古懷黃金駿馬何時來平生鬱鬱復鬱
鬱幽抱一爲先生開廣場短絀不得舞躍馬橫矛自失伍天涯
願曲有周郎鐵撥餘衰豎候吐長安米貴不易居大兒文舉今
無書揭地掀天布衣耳作活那得同樵漁野鶴襍好骨相儂
懂仙人住蓬閣英雄從古例吹簫烏鵲南飛雁北向人生年壽
不滿侂萬事過眼如雲煙名山珍重當作述囊底莫便愁無錢
大幕山前春草綠行腳歇脚願亦足一卷書成魁紀公當時祇
有昌黎讀

自題懺華辭後

石門文字認休差一串流珠送琵琶
往日春風紅豆子今生明月白梅花
閒愁黯黯濃于酒綺語絲絲豔似霞
辛辛苦維摩耽結習自拈寶露滴靈芽

稽首楞嚴十種仙無情眷屬有情禪
可堪芍藥將離酒尙說桃花未嫁年
春夢半牀鸚鵡地秋孃一曲鷓鴣天
當時人面羞崔護不爲重來也惘然

對影聞聲惜未逢滿空雲雨去無蹤
秋波四壁生瑤想神女三年禮玉容
綠酒獻花詩獻佛青樓聽雨寺聽鐘
相思海樣愁天樣一樣魂銷藥店龍

華鬢世界妙鬢雲孤負香鐙已十分
金粉未能空色相人天原合住聲聞遙
岑眉樣修蛾黛芳草天涯化蝶裙直
到靈山參一

笑平生筆硯總宜焚

琵琶行

辛丑春余以避人屏跡南雁蕭寺有叩關客挾琵琶直
入鼓再行遽爲激楚之音余察其人亦有心者乃笑曰
盡君之伎當爲詩以張之於是復呼一少年鼓卸甲陳
隋諸調相與命酒擊節極權而罷走筆成此亦名之曰
琵琶行

兩年不聽琵琶聲琵琶人去難爲情樂天琵琶感遲暮梅村琵琶調尤苦一樣琵琶鉛淚傾爲君別作琵琶行是時元夜節已過落鐙風裏鐙欲破彈出交輝鐙月光承平樂事聲悠揚須臾少年揖客至妙手云是名父子轉撥鶻弦一兩彈已覺泠泠指

下寒沙場萬馬勢騰踏酒酣忽卸大王甲帳下虞兮不忍歌楚
 聲四面何其多移宮別按陳隋調後庭玉樹秋風老門外韓禽
 兵氣驕臙脂井底春紅銷坐中恐有客不樂曼聲復似前溪曲
 楊柳樓臺綠幾圍夕陽簫鼓伎船歸子弦零星老弦急入破裂
 繒出裂帛一面琵琶八面風浪浪海水青天空抱琴我昔空山
 麓吳市短簫燕市筑妓堂品劔霜花飄美人勸我紅檀槽平生
 惜少此絕藝失意彈詞廿一史倦遊寂莫來江天煩君爲我銷
 愁顏方今海內苦鋒鏑請以琵琶去擊賊

菴溪晚眺

西風扶帽寺門前野水微茫畫遠天衰柳暮雅遮不住夕陽紅
 出換菱船

書明史戚繼光傳後

有明當中葉倭寇方縱橫東南數大將弟一戚家兵鴛鴦結小
隊旗鼓主中營沿江重斥堠刁斗終夜鳴訓練既有素威尊令
必行撫循等骨肉感激身命輕以此赴敵愾入海殲長鯨閩浙
及交廣聯絡勢合并保全任終始賢相張江陵封疆倘掣肘功
業墮垂成盡如戚少保海內常承平

祝楚翹

椿年

約余梅花時往訪又寄催花詩四十韻偕李

吟鄉明經

塢

聯句次韻以報

昨夜夢見之

敦復

忽入萬花谷一片白琉璃

李塢

積雪滿平麓

空山鐘磬沈

劍人

孤往自躑躅前有碧磻橫

吟香

徑仄橋木獨

茅屋三兩家

劍人

寒雅散林樸有美何婉孌

吟香

天然屏膏沐

飄飄五銖衣

劍人

手把黃庭讀讀罷鳴玉琴

吟香

一一鴻飛陸

瘦骨餌紅芝

劍人

長眉掃蛾綠藐姑射之山

吟香

瑤島相追逐

下拜驚天人

劍人

或者仙飛肉清嘯擬鸞皇

吟香

逸響非凡筑

殷勤前致辭

劍人

吐氣何芬馥迷離恍惚間

吟香

翠羽林間伏

此是梅精魂

劍人

翛然出塵縛冷冷吹珮環

吟香

苦恨曉風促

朝來得君詩

劍人

慰我腸回轂倘作催花使

吟香

除君更誰屬

客臘黃香來

劍人

聯譜非同族花如蘊櫝姿

吟香

詎爭磚與碌

又如野鶴蹤

劍人

肯儕雞與鶩如彼素心人

吟香

幽貞願自足

如彼金谷嬌

劍人

待聘珠十斛索笑良獨難

吟香

巡檐屢往復

疏影橫清溪

劍人

苦枝未綴玉點筆向晴窗

吟香

高歌調難續

不須奏綠章

劍人

但報以赤櫝本是弟一花

吟香

莫負羣芳矚

方當行春令

劍人

生氣異秋肅如何月落時

吟香

顏色徒仰屋

願花一夕開

劍人

輝映及鄰竹應令禪悅人

吟香

色聲香味觸

五體更投地

劍人

頭面手足腹水邊一幅畫

吟香

樹上一匹瀑

青邱一首詩

劍人

白石一聲曲酒人驢背馱

吟香

書卷牛腰束

坐花紅氍毹

劍人

酌花青醴醪贈花百琲輕

吟香

錫花九命辱

羯鼓撒白雨

劍人

讓君才藻速前盟媿未踐

吟香

悵望雲中鶴

劍人

古意一首柬范雍亭刺史

鳳階

王四篁二尹

潤

消息無因問短琴天風環佩託知音誰憐駿馬黃金骨難悔姮娥碧海心日暮孤蘭愁道遠天寒倦羽入林深窗前一夜聽檐鐸江上還爲處女吟

楚翹書來譚海上近事感此寄答

男兒百計無一好富貴還須致身早我獨飄流變姓名君今慷慨思燕趙海上年年枉用兵紛紛客將徒連營角聲滿地暮不息樞馬中夜殊悲鳴蝨茲醜夷何足數內地深入斷歸路越險誰爲間道謀當幾恐被庸人誤浩淼煙波指顧中英雄談笑能成功讀書但識忠孝字變化要與風雲通 朝廷操縱有至計天下豈非吾等事金門鸞鷲倘高竊玉帳貔貅任驅使何當報國畱心肝匡時經濟從艱難煩君一獻太平策我亦因風縱羽翰

送四篁以憂解官歸里

別君無一語感我此千秋風木平生恨煙波自古愁麻衣空去

國烽火獨登樓握手各揮涕悠悠江上舟

上巳日作

曲水流觴事渺然蒼煙落日滿前川
風花小住剛三月萍梗多愁又一年
頗憶星辰瞻北斗似聞鼙鼓震南天
春來不見湔裙女惆悵芳塵委翠鈿

閒憶

東風吹夢細于煙傷別傷春意黯然
愁唱江南斷腸句落花時節嫁人天

墨會靈簫事有無華年如水病模糊
風前未乞桃花命一角羅囊瘞綠燕

壬寅春感

蕭蕭短鬢問年華萬古傷心賦落花烽火連天春入夢江湖滿
地客無家靡蕪細雨兼愁長楊柳東風盡日斜搔首蒼茫成獨
立高原夕照噪昏雅

昨歲 朝廷賜尙方元戎千騎出鷹揚金貂翡翠飄晴雪玉帳
蒲桃進夜光八陳風雲思上將萬方日月奉 天王艱難自是
籌兵食早晚功成告 廟堂

九重綸綍下求賢 帝爲蒼生廢食眠唐室徵兵先保甲漢
家納粟重輸邊朱雲請劍爭奇節賈誼陳書感少年將帥卽今
開幕府有人捫蝨隱江天

南陌行春路阻歧采蘭拾翠寄相思天邊消息龍鷺近海上風
煙鷗鷺知食肉何人羞燕領入宮有女妬蛾眉欲憑青鳥傳芳

訊開落蟠桃弟幾枝

獨行海上作歌告哀言之無罪惜當事者終竟不聞也

讀書必讀尚父韜結交須結扶風豪崎嶇天地不得意冷落人
間一寶刀我行出門數千里落落陰相天下士開口談兵笑我
狂塞默胸中負深恥拔劍四顧心茫茫斗血海風吹不涼軍門
長揖獻奇策竟受謠詠蛾眉傷嗚呼男兒生死本度外何人報
國心肝在 君父如天忍面欺廉恥掃地甘身敗債帥威輕
令不行前車轍覆今能再客將連營意太驕鄉兵入市市人號
亞夫軍中但堅臥高克河上徒逍遙老成孤立辦一死未顧
國體輕鴻毛居民一日屢駭竄連天妖火驚飛濤惜哉吾謀竟
不用坐視安用藏蓬蒿憂以思歌且謠但見大海之水東南日

夜流滔滔

潁川將軍行爲陳蓮峯軍門作

道光二十二年夏五月暎夷入吳淞總督及徐州鎮總兵官率其眾先遁師潰提督軍門陳公化成死之公福建同安人少時慕其鄉李壯烈伯之爲人由行伍積軍功洊升至是夷事急公自請移駐吳淞口與士卒同甘苦歷三年如一日軍興凡節度調遣均非公意余嘗謁公論兵事深以上下苞苴文武塗飾訓練無素心力不一爲憂公歎曰吾武人脫不幸知有死耳余曰公死如國體何因具陳戰守方略且言夷人入上海乃死地可計殲之公爲言于當事者弗聽會有蜚語欲中傷余

遂去而公竟歿矣事聞賜諡忠愍子卹如例地
方建專祠督鎮咸得罪去

潁川將軍真人豪身經百戰
輕雁旄三年蒼兕臥鼙鼓一朝白
馬乘風濤濤上頻年有邊警
詔書特許公移鎮持重能綏將
士心忠貞獨效疆場命義我巨礮
東西臺樓船橫海風煙開此
是江南金鑠鑰紅洋萬里唱檀
來消息南來堪一慟出師大將
銘旌送越王臺下陣雲寒羅刹
磯頭雪花凍從容冠劍領諸侯
幕府風流江左愁豈有龍韜稱
節制漫勞虎帳誤軍籌萬事從
來悲掣肘如此雄關偏失守武
臣死耳復何言國恩天壤誰
生負公時意氣凌雲霄登壇
慷慨藏鞞刀酌酒今日好男子
要當殺賊始英豪火龍百道赤
標怒白鬼煩冤黑鬼苦十盪
十決

勢未窮再接再厲事乃誤江頭告敗日紛紛死事流傳尙未真
霸上棘門等兒戲蕭孃呂姥各全身問道今年已通市 朝廷
自爲蒼生計蠲租 詔下萬人懽可憐六郡良家子太息昆池
有劫灰卽今誰是濟川才袁家戰壘西風裏憑瀆潮聲日夜哀
吳淞失守有死事甚烈者逃潰文武亦衆書以志憤
女子猶知賦小戎男兒那作可憐蟲孤城一燼風猶烈義士同
聲鬼亦雄晉鄙有軍皆壁上亞夫無令在師中吳淞野哭滄江
冷蘆葦蕭蕭夕照空

潤州書事

北固山雄北府兵南徐重鎮控南京但聞天上將軍下不見軍
中鼓角鳴烽火照殘揚子渡旌旗愁望廣陵城斬王戰蹟今何

在簫瑄樓船落日橫

從弟子建

敦禮

至自兵間

相看疑入夢爲客倍傷情身在憐吾弟門衰媿爾兄風塵難覓
食江海未銷兵併作今宵淚朝來白髮生

古豔詩

遙憶春城貴主家玉簫金瑄厭繁華尊前翠燭三更倦樓上紅
簾四面遮羅衣坐歎秋風早銀漢中間波淼淼保母無言侍婢
癡盛年光景空愁老

石家金谷寵名姝鬪損腰支玉不如主人恩重翻爭妒房老身
閒疆自娛雲窗霧閣從容坐秋月春風等閒過轉眼豪華付逝
波綠珠一夕紅樓墮

昨日橫塘風已秋，女兒還上采蓮舟。
相將笑語不歸去，暮雨瀟瀟水閣頭。
鹿盧一夜催金井，鴛鴦瓦重霜華冷。
吳王宮裏曉，雅啼醉擁西施眼未醒。

上堂挾瑟邯鄲倡，一曲春風歌斷腸。
二八嬋娟手擷篋，十三姣小口呵簧。
纏頭百萬銷羅綺，選色徵聲不知止。
車如流水馬如龍，老大蛾眉悲永棄。

聞欽夷議成大帥班師作

玉帳紅旗江上屯，元戎振旅令彌尊。
中朝不戰銷兵氣，絕域求和識聖恩。
華夏風雲天未定，封疆功罪事難論。
諸公莫忘艱難會，回首狂飈薄海門。

秋懷

閒尋芳草白蘋洲。入世何堪我獨愁。小雅文章真痛哭。美人顏色不宜秋。似聞碧海沈青羽。遙指瓊樓掩玉鈎。片石殷勤置懷裏。迢迢西北暮雲浮。

舊日風塵駿馬圖。不成依樣畫胡盧。愁來名士呼鸚鵡。行到空山聽鷓鴣。把酒天高何處問。談兵人笑此才麤。匆匆一擲成孤注。悔煞黃金賺博徒。

咏古三首和陶

一疏

王事云靡盬。貞臣敢求去。媿彼尸位流。庶幾踐高趣。車馬盈東門。鴻鵠已騫舉。吾思一疏心。豈厭太子傅。華轂而朱輪。赭衣滿道路。公卿若小吏。要領那得願。國體貴善全。沒齒獲令譽。權勢

相傾軋旁觀代深慮牽犬入上蔡惜未識時務白哈以臨刑悲哉負儒素鐘鳴漏盡時下士竟弗悟知幾其如神危事豈在著

三良

丈夫意感激身命輕如遺一朝螻蟻食百輩螻蟻微三良既以殉黃鳥鳴哀私壯士臨隧穴英風動靈帷君命雖云亂臣節敢自虧倘使赴敵愾視死尤如歸全軀保妻子飾說多依違成仁在取義今古亮所希我誦三良詩怛焉中心悲秦風固烈烈同仇賦無衣

荆軻

車驅不復顧入此虎狼羸衣冠白如雪千里送荆卿酒杯澆熱血努力在茲行頭顱爲公擲仰天笑絕纓平生重意氣不爾胡

秦兵孽筑動天地志已無秦聲田先生既死樊將軍何生肝膽
舞陽裂魂魄祖龍驚劍術雖未講烈士固狗名美人惜菹醢駭
馬空前庭時危任刺客才豈當干城咸陽楚人火西風漢家營
天意固有在人事奚由成故交屠狗輩痛飲難爲情

古鏡

萬古一輪月菱花照影深自然無我相先有不磨心病閣朱顏
老秋宮碧蘚侵人間少肝膽棄擲到如今

古琴

泠然七條玉眾籟寂空山抱此羲皇上獨畱天海間百年名士
盡萬里逐臣還悅耳一時貴箏琶未可刪

古劍

太古白虹精風雷繞指生一龍吟有態百魅走無聲不殺至仁
事難平壯士情西人畢頭白急爲報 時清

古硯

一片媧皇石千年文字祥風塵留隻眼楮墨落奇光玉帶山河
重桃花煙水香平生此端士巖穴莫深藏

書岳忠武王手書石刻後

忠武書云軍事旁午未得時候台安遠蒙翰教忠懷義
氣直薄雲漢而貫金石凡在舍靈能無奮感况飛素切
同仇者耶比已鼓勵軍士直抵淮陰滅此而朝食上報
國恩而答知己飛之願也卽不然亦誓惟力是視生死
以之決不鼠走狼顧偷存視息于人間也使還附此申

謝不宦岳飛頓首觀文相公閣下案是書當作于建炎
初年禦金人于江淮間事此後平湖湘諸寇經略中原
矣觀文相公者李忠定公也讀之二公生氣懍懍千載
如見墨蹟向藏吳中顧氏今刻石于上海邑城岳祠左
壁敦復每拜祠下流連不忍去道光壬寅冬十月避夷
難後迨出滬城重有所感乃爲是詩

天荒地老心不死走壁龍蛇書一紙古來忠孝幾完人要令男
兒識此字此字聖賢豪傑鬼神風雨河嶽而日星此書一百四
字字字烈丈夫之血淚迸裂心精凝中興諸將最少年惟公報
國忠孝全胸中誓雪君父恥肯與和議相周旋讀公書攷公事
建炎三年公在江淮官統制觀文相公當是三月罷相李伯紀

其賦無衣譬大義手提壯士抵淮陰眼中醜虜皆成禽國恩知
已兩不負祇是區區一片心南薰門鐵路步撼岳家難畏如虎
張德遠秦會之一誤再誤失地復喪師文官愛錢武惜死東南
時事可知矣兩人一心成大功無恙河山碧水一自孤臣去
國遣金牌火急詔還朝風波亭子瀟瀟雨比似松風更次寥忠
定遺書惜未見與公恩誼當纏繞紛紛鼠走而狼顧視慰偷存
雞狗賤嗚呼彼雞狗者何其多吾思古人挽頽波大書諸葛出
師表再讀文山正氣歌

題嘉定朱孝子傳後

孝子傷心日高堂衰病親豈因兒割肉已報父生身
孝子有割
肱療親事
完行千秋事斯人一性真蓼莪吾廢讀涕拜先民

晉中丞百補袁中甫翼大令

繇上田

艱難臣主暮年情白水空勞舅氏盟公子無家今得國
小人有母敢求榮淒涼狗兔功名薄慘澹龍蛇意氣平
焦土一坏行賞畢寒煙落日野田橫

石勒城

丈夫不學曹孟德磊落平生亦壯哉但遇高皇真北面
卽論夷甫豈庸才人奴相過封侯望鞞鼓聲從好殺來
破汝清潭一長嘯神州回首陸沈哀

汾亭

六籍卮言擬未工尼山竊比太雷同上書止挾縱橫術
講席先

開道學風姓氏千秋疑鬼谷文章後世有揚雄怪他房杜稱門
下不爲蒼生一起公

孃子城

小隊紅妝結束新英雄難得女兒身神仙眷屬憐夫婿旌旆飛
揚有婦人錦繡亦登名將傳楊花空落戰場春累朝貴主慚宮
史似此蛾眉洵絕倫

媚山

垂簾鸚鵡夢全空墮地蓮花濺血紅禍水竟消唐主福雌風偏
起大王雄臨朝呂雉才非易好色關雎事不同一唱回波更陽
斷牙籌手點出深宮

陰地關

桃花馬上雪花飛，女子和戎計總非。但使軍中來尙父，不教塞外去明妃。三秋白草花門戍，一騎紅妝葉護歸。可惜蛾眉眞將種，陰山回首陳雲圍。

王宮谷

自呼麋鹿與同羣，朝局如棋不忍聞。生託罪言狂杜牧，死官諫議惜劉蕡。才人末路悲青史，詩品空山贈白雲。他日清流邁奇禍，淒涼柱笏看斜曛。

野史亭

京洛衣冠委逝波，茫茫野史恨如何。愁看故國沈遼海，忍送降旛下汴河南。渡兩朝和議失，中州一集正聲多。雁邱樂府傷心甚，老淚青衫付短歌。

書明史熊廷弼傳後

一舉蕩平六萬眾大凌河前哭聲慟尙方先斬棄城逃赴敵致
死敵亦動可惜經略見不到庸奴肆口闞奴笑封疆忽入鈎黨
禍楊左獄連太草草不見前年遊事始四路出師楊鎬死朝廷
植黨動牽制明季之壞壞以此封疆事當任封疆吏自爲之奈
何拾帖括語徒亂人意爲

儼古

快馬不絡頭千里走報讎神龍不見尾挾浪凌滄洲一朝受束
縛性命安可求棧豆三升懲鞭笞失驕驕風雨半天落鱗甲掀
泥溝古來輾軻地能爲壯士憂長歌行路難請從汗漫遊

嘯古堂詩集卷五

子同寅伯威甫校字

嘯古堂詩集卷六

寶山蔣敦復純甫著

長洲王 韜玉魴棊

虎邱

劍氣化爲虎虎氣化爲石石氣不得化千年土花碧

劍池

蛟龍不可見碧水涵秋空如聞雷雨夜神物起池中

五人墓

白鞞較尉聲如雷琅當手擲呼囚來詔書非出天子意東廠逮
人誰敢哀萬人冤憤五人怒老拳直下撒白雨緋衣玉帶走入
厠請緩須臾公勿顧他日事定告廟堂首禍安得逃王章公道

既申國法在臨刑大笑神揚揚吁嗟乎委鬼當頭坐茄花滿地
紅巍巍功德稱上公筆削要與春秋同讀聖賢書學此等事美
官厚祿保妻子古來忠孝事惟愚夫婦能爲之千載猶生一朝
死彼五人者亂民耶義士耶凡諸有位者恥耶

閭門卽事

金閨門外舊停船自別蘇州又幾年七里山塘三五夜樓臺如
夢月如煙

舞扇歌裙又一時花飛劍動寄相思閒鷗心事眞如水付與楓
江釣叟知

瓊姬塚

瑟瑟紅霜殞紫蘭珠襦玉柙怨飄殘有情貴主懷春早絕代佳

人得堦難香骨忍蕤鴛塚小妝樓空憶鳳簫寒祇今十五嬌羅綺盡解相思倚畫闌

夜泊澣墅

半程來澣墅卅里去閩門收網魚天濶當關虎吏尊客愁詩亦稅鄉夢酒難溫篷底不成寐惟聞白鳥喧

梁溪書所見

夕陽紅得可憐生仙夢分明似碧城一桁簾衣人不見篆痕花氣玉簫聲

遊惠山寺

古寺孫吳夕照幽匆匆蠟屐紀來遊半空嵐氣青圍郭十里湖波綠上樓小苑秋蕪高士卧荒菴春雨道人愁劇憐泉味清如

許枉說人間第二流

聽松石

石高三尺許狀若醉卧者篆文聽松二字相傳爲李陽
冰書背有行草書五行漶不可讀舊沒惠山寺殿階下
李蘭卿觀察彥章命邑令某移置殿左築亭居之石得
所矣爲作此詩

松下卧石石有情石上聽松松無聲
松耶石耶醉不醒松花自
綠石氣青卽今無松但有石并無有石計亦得梵宮冷
闕苔蘚深文字磨滅人不識我來見石不見松
殿角謾謾生天風世間幻影隨起滅
破碎明月成虛空松無聲如太古石有情如處女
問松松不語抱石石睡去道人欲參何處禪
仙鶴一雙飛上天

艤舟亭

佳辰理芒屨出郭恣幽賞石鑰啟巖扃林霏露雪裊緬懷玉局翁高蹤惜已往煙際聞琴音何當鼓蘭槳

古藤花館訪東坡僦居故址

老去君恩賜草萊買田陽羨尚徘徊三春破夢神仙骨萬里投荒宰相才明月瓊樓何處問朝雲瘴海未歸來高原酌酒呼千載大樹西風滿劫灰

隋宮曲

常州城東南夏城有隋十六離宮故址案大業十三年敕郡通守路道德集十郡兵匠創離宮于城東南周二里左麗光流英紫芝凝華景瑤浮彩舒光懿樂右采

璧椒房明霞朱明翼仙翠微層城千金也又有涼殿四
圓基結綺飛宇漏影規制仿洛陽奇麗過之見常州勝
蹟志

煬帝離宮一十六隔江風起秋螢綠蛾眉欲抱沈郎腰

謂天門將沈法

興據郡反龍船不唱隋家曲歌舞蕭娘尙未休揚州明月又常州
脂質斷江南色不見楊花日暮愁

雲車謠

常州俗祀隋將陳杲仁每四五月間迎神出巡輒以幼
女扮演故事有似鞦韆架式者或縛置鐵竿上一人肩
而行謂之雲車一或蹉跌立可殞命是亦不可以已乎
蜨衣曬粉紅烏炙蟾珠冷抱紺魂泣黑風飛碎五霞裾鶴背瑤

姬冰骨裂十三羣娃嬌可憐黃金買斷花如煙彩繩生縛姮娥
死雲車縹緲仙乎仙乎不得語芳犀摧散入雲去斑斑淚作
臙脂雨

過卷施閣感懷洪江北太史

一上封章萬里行賜環百日涕縱橫狂奴不死羞黃祖

聖主無心殺賈生投老江湖還使酒著書忠孝獨關情雄文敢
說相如亞名在千秋我未成

銅陵章犀臺徵君謂余文似稚存
又云年四十前所見有稚存四十

後所見
惟子耳

答楊亮先太守臣誌

北平才子舊知名卅載三吳宦蹟清風月文章蘇玉局江山絲
竹謝宣城荃蘭獨抱矜標格漚露能親見性情此日東南重籌

筆好施方略慰蒼生

雲溪水閣紀事

常州龍船天下稀白雲溪邊多女兒兒家水閣開新月不唱瀟瀟暮雨詞

斜日紅簾半上鉤風來茉莉正梳頭願塘橋外盈盈水但宿鴛鴦不宿鷗

姊妹相呼妒小名麻姑老去尙多情柳枝桃葉都難問喚取雙憐總是卿

花枝臨水月臨街花月雙修玳瑁齋愁說十年前舊夢夜深鏡火似秦淮

護國寺弔宋萬安和尚

寺在常州東門內宋德祐元年元伯顏兵南下攻郡寺
僧萬安率義兵與郡守姚訢誓守城城破力戰死詔贈
武功大夫入祀忠臣祠萬安在軍中作詩有云時危聊
作將事定復爲僧識者壯之詳郡人左輔碑記

英雄學儒必學佛天人戰勝持定力英雄爲將卽爲僧大義了
了明心燈常州城東護國寺毅魄英風照青史正氣先畱不二
門忠臣合祀禪和子是時南渡勢已危北來萬馬江中馳阿師
起義誓城守白日不照天王旗敵氛不滅師不生刀頭熱血金
光明睢陽常山亦人耳安與君父稱無情藏春散人號佐命楊
璉眞伽肆梟獍法門破壞阿修羅若輩貪利喪佛性亦有腰金
橫玉人畫船歌舞西湖濱髮膚尙愛况性命高位坐使中原淪

嗚呼萬安區區一頭陀忠義能與姚公具風塵物色苦不到天下英雄無處無

贈繆少微黃武香兩秀才

澤畔相逢定楚狂行歌入市意茫茫文章各有升沈感人世無非聚散場多病風塵宜自愛此身湖海恐難藏九原酌酒同揮涕江上孤忠弔夕陽

時校勘江上孤忠錄

書文文山正氣歌後樂府十二首

太史簡

大義魯春秋直筆齊太史人固有一死太史秉筆執簡而書之一太史死數太史秉筆執簡而書無異辭烏乎春秋大義尊王綱太史直筆凌風霜千年萬古臣子之大防

董狐筆

嗾一獒不能殺其臣而使之逃雖然彼無君者與犬食之不足
污歐刀靈公之靈乃若此趙盾僥幸竟不死君子聞之曰董狐
古之良史矣

張良椎

中庭柱荆軻劍中副車張良椎祖龍祖龍似有天授非人爲暮
年帝者師少年報韓死大索十日天下多殺壯士幸哉狀貌如
婦人女子

蘇武節

萬里歸來一枝節十九年中咽冰雪盜羊誰與案丁零射雁依
然居大澤妻胡婦而生子此必無之事爲李陵衛律輩游說耳

安東將軍故府視蘇武節似不如是

將軍頭

蜀中有斷頭將軍無降將軍將軍一言天下聞將軍五體惜未
分一解將軍縛再策將軍勳將軍故主殊少恩蜀中無斷頭將
軍有降將軍

侍中血

乃父人中龍生子當立雞羣鶴司馬家兒惜太惡王裒爲孝子
嵇紹爲忠臣各行其是惟一眞死忠死孝皆完人紛紛典午自
屠滅他年行酒帝衣青黃日六軍帝衣赤君不見侍中血

睢陽齒

鼙鼓動地來漁陽中興社稷三汾陽誰知事勢當倉皇功烈第

一張睢陽睢陽一身都是齒碎賊萬段不足當一噬殺妾斬馬
羅雀掘鼠熱血淋漓南八指

常山舌

哲婦舌傾城佞臣舌破國惟有忠臣之舌辦殺賊舌本蓮花光
五色常山平原好兄弟成敗生死安足計不識真卿作何狀他
日堂堂罵李氏

遼東帽

南陽一龍高卧起遼東一龍不見尾出沒變化須臾中綸巾皂
帽俱英雄英雄出處關天下氣節能留漢家祚前有桐江後柴
桑數點梅花天地香

出師表

大漢丞相大討曹旌旗戰伐風雲高漢賊若非不兩立布衣臣
本安蓬蒿出師上告先皇帝鞠躬盡瘁死而已大星一落大事
去渡河者三亦如此

渡江楫

祖生祖生爾何人大志慷慨清邊塵誓平燕趙奉京洛激昂天
地生風雲拔劍起舞劉越石中原有數幾人物奈何天生一石
勒渡江五馬一馬龍惜少中流此擊楫吁嗟乎祖生獨擊中流
楫

擊賊笏

笏朝天金魚紫袋緋衣鮮笏擊賊青天盪盪飛霹靂笏代筆春
秋折獄案成鐵笏當刀髑髏饑餓奸魄銷笏乎笏乎歸來乎滿

牀乎不如茲一學乎堂堂復堂堂乎

朱稽松學博

鳳笙

屬選陳雲伯大令頤道堂集爲題一詩

卽效其體

碧城如夢夢如煙修得人間有漏仙
七品風流蝴蝶吏諸天懽
喜野狐禪畫樓楊柳銷魂賦
玉帳蒲桃出塞篇老去心情可無
恙選詩選佛兩茫然

暨陽懷古詩四首

吳季子墓

歷聘曾登上國壇蕭蕭草樹此衣冠
能修友誼交原古翻啟爭
端讓亦難愛子魂歸鄉路遠故人劍
在墓門寒家風采藥知何
處秦伯祠邊夕照殘

春申君墓

分封吳越擅名區熊繹開疆恐不如雞狗餘風賓客賤江山奇
貨美人居會盟未定縱橫計俎豆翻成水利書一樣宗臣難合
傳湘潭遺恨弔三閭

劉伯倫墓

一頌何妨醉百旬青山薶骨亦嶙峋中原經略無王佐兩晉風
流有酒人杯外已忘朝局改牀頭難免婦言嗔九原欲起先生
飲江水湯湯墓草春

蕭天子墓

梁敬帝陵也

蕭梁遺蹟問斜曛霸氣荒涼建業分禪讓已終江左局漁樵誰
識帝王墳園林白露悲喬木樓閣青山起暮雲轉眼興亡緣底

事後庭玉樹不堪開

偕劉雲齋孝廉

傳

夏永熾

煒如

仰萃齋

振瀛

登君山作

青天手折芙蓉來
天風吹墮芙蓉城
芙蓉朵朵落天外
一朵化作君山青青山
見人笑不休
幾輩著屐能來遊
三千珠履竟安在
寂莫春申土
一邱秋空叫破海
潮碧酒醒一枝寒
玉籟振衣絕頂發
高歌水底老鯨抱
珠泣金支翠羽江神哀
鼉白日遊蒿萊眼中不見三神山
弱水清淺生黃埃
浪花欲來山欲去
石壁返照赤霞暮
坐看三十三芙蓉
飛上青天不知處

鵝鼻峰

鵝鼻一峰何巉巖
縣厓欲落蒼波銜
之而怒攬霹靂斧
夫容倒臨玻璃嵌
槎枒半壁白齒齒
瓊瓏一髮青
影影岷濤萬里勢
溟

泝東南直挂樽桑帆橫衝江海當十萬突過百二秦嶺函側聞
去年島夷至虬髯高坐紅氍衫兵單將懦事倉猝坐令天塹揚
風颿樓船將軍失楊僕和番使者來渾瑊古來此地有爭戰
王大鼓江中摻卽今經畫尙非後北門鎖鑰巖疆巖我疑造物
自設險驅使六甲窮雕鏡譚兵惜未試馬槊誅茅只合依松杉
手攜綠酒倚絕磴大叫闐闐除天機行歌歸路答樵響江上白
月生秋燹

暨陽三隱樂府

古來高隱如巢許輩代不數人漢以下尤寥寥焉閱江
陰邑志傳隱逸者數十人亦汰已就所著錄得心慕者
三人餘第弗深考可概見爾

魏璞

唐末人才志高曠積苦力學杜門二十餘年與陸龜蒙皮日休友善每秋風時乘短舸偕載酒浮游煙水間皮陸各有贈詩稱古君子

有唐隱士魏名璞字不琢粹然一身太古玉生延陵季子之鄉友者誰皮與陸秋風短舸酒初熟江湖拍浮計亦足此之謂天民世不得而榮辱

千十一

南宋人嘗爲承仕郎國亡隱居梧棲里明宋濂爲贊比之四皓云

覽輝之鳳豈樊籠之可羈奮天之鴻豈網羅之是罹鴻有時而

被羅鳳有時而在籠卓哉千一乃是人中龍柴市死梧塍終
彼易地將無同

大育頭陀

明季人諸生負不羈才謂人生當效班定遠傅介子立
功萬里外遭國變嘔血數升嘗有句云滿地蘆花和我
老舊家燕子傷誰飛又詠梅云宵可枝頭抱香死何曾
吹墮北風中生平精音律每彈離騷聞者歔歔欲絕晚
年乃奉佛云笑和尚哭道士皆同時人

白石山和尚笑席帽山道士哭大育頭陀不笑亦不哭胸中一
斗血漉漉

桃花菴弔唐六如

眼底湖山筆底馳丹青以外世誰知三生色鬼談禪品一卷才
人失意詩何物與君堪下酒此兒恨我不同時愛他風骨真名
士肯把黃金換畫師

賓客梁園賦遠遊肯濟枚馬便歸休驕王殿上三遺矢素女圖
中一轉頭畫舫笙歌團扇影桃花煙水夕陽愁生天慧業風塵
誤回首瑤京十二樓

江湖飄泊好文章花落胥臺事渺茫但有乞兒呼夢晉可無佳
口誦秋香買來風月何妨賤除卻科名儘許狂絕妙三弦彈近
調聽他盲女說荒唐

許樵雲廣文

慈椿

招同王述亭

念昭

雷硯農

良樹

顧韋人

作偉

小飲葺城北郭

塵夢廿年別草堂今日過江湖絲鬢短天地酒人多青史竹如意紅顏金叵羅扶風有豪士一醉且高歌

黃研北司馬

仁

顧卿裳太守

夔

招入吟秋詩社分詠

老將

猿臂歸來意氣空少年射虎出雲中寶刀血鏽芙蓉碧病馬秋高苜蓿紅大雪關山銷日月西風杯酒泣英雄太平宰相眞閒暇不許沙場上戰功

老伎

當筵誰擲錦纏頭傷別傷春祇自愁楊柳有絲三月暮琵琶無語四弦秋定情恩重殘脂盞繡佛燈明舊畫樓若把名花比顏色芙蓉霜後更風流

古詩一首寄懷陳寄舫

式金江陰

買絲不繡春申君，杯酒但澆劉伶墳。大江昨夜秋風起，黃鶴一舉空浮雲。秋風吹破浮雲色，中有美人忘不得。我時走上鵝鼻峰，痛飲狂歌叫天碧。美人憐我行路難，贈我九畹之芳蘭。懷中一月香不滅，報以雜佩青琅玕。古來結交重知己，牀頭三尺玉龍子。爲君慷慨發幽情，明月皎皎大江水。

吟秋社第二集詠宋中興四將

中興四將舊稱張韓劉岳，謂張俊、韓世忠、劉光世、岳飛也。俊將兵最先，始終寵遇然。黨素檜構岳飛，光世亦宿將。江淮三大帥，中遇金兵輒畏蒞，不前皆可鄙也。易以宗澤、劉錡差無媿云。

宗忠簡

長驅胡騎滿風煙，畱守旌旗落照邊。
生不渡河勞北望，死猶遺表惜南遷。
隴西竄逐悲同志，鄂國功名起少年。
一自中原星隕後，小朝廷事倍堪憐。

韓忠武

清涼居士太清癯，大將頭銜換酒徒。
兒女有人憐臥虎，英雄無地著騎驢。
截江師敗聲名重，撼岳謀成氣類孤。
太息角巾歸第日，趙家山色滿西湖。

岳忠武

王氣秦城半壁開，岳家遺恨滿蒿萊。
朝廷計畫和戎急，大將功名叩馬來。
玉斧河山三字失，瓊裘風雪兩宮哀。
金縉千古成奇

策長腳當年宰相才

劉武穆

一戰成功紀順昌
鞞尖何物最披猖
濠邊鼓角來天上
刀下人頭落電光
猿臂軍聲諸將妒
龍媒病骨暮年傷
怪他兒輩真豚犬
瓜步寒潮咽夕陽

儀上人禪房

妙隱東林外
招提北郭邊
雲留孤鶴夢
樹識老僧年
野篠綠逾淨
疎花紅可憐
茶寮一清詠
古翠落松煙

秋夕感舊

華年如水夢如塵
圓月幽輝記不真
渺渺前身似河漢
明明昨夜有星辰
孤凰影碎琴邊語
瘦蝶香銷帳裏春
樓上穿鍼樓下

拜思量何事不傷神

襦衫利市最關情似此飄零最負卿住亦可憐何況別死猶多
恨不如生鸚哥瘞雪銷塵紫龍女拈花種福城寄語華鬢來聽
講繡旛風定一燈明

題宋太學生陳東盡忠錄後

李綱不相帝北去李綱再罷宋南渡一李綱耳何足言天下事
竟從此誤太學生員東海民上書再三披逆鱗皇帝陛下太祖
太宗之子孫臣是太祖太宗皇帝陛下之草莽臣陛下用臣者
用李綱社稷幸甚天下幸甚不用臣言李綱一去臣禍止僂身
咄咄陳少陽朝上書暮下府帖黑索來琅當天子召我不一見
顏色請爲家書辭老母北面就縛神揚揚罷李綱相汪黃走建

康都餘杭兩河不復兩宮哭百姓願食汪黃肉汪黃鄙夫非復
識人倫公在宣和政和間何不請尙方劍誅蔡京王黼輩言利
之小人

東王四篁貳尹

不分愁邊與酒邊相思相見復相憐有情芳草都如夢無賴秋
雲欲化煙入世每看黃鸝舉出山應悔白鷗眠明珠滄海誰遺
卻後夜青天月正圓

贈瀟煙樓女子

女子康氏字鬢仙南匯人風鬟霧鬢蕉萃可憐欲以弟
子禮事余不可則泣曰兒不幸墮落至此命也他日願
附姓字君詩文集中死且不恨聞之憮然乃贈四絕句

越數日則已次韻和余悽婉可誦噫若鬢仙者殆亦古
之傷心人與

重見雲英思黯然秋燈無語恨
緜緜西風莫便吹搖落身似垂
楊瘦可憐

輕煙消受落紅時翠袖闌珊半不支
一枕髮香人夢醒綠窗微
雨聽彈詞

似水年華悔有情難銷薄福是聰明
天涯何況曾相識愁聽琵琶

江上聲時購得玉壺山人江上琵琶圖與鬢仙貌酷似

一片華鬢色界天我聞如是散花禪
好除結習消塵障證取心

香繡佛前

儼三十六體四首

唐李商隱溫庭筠段成式三家詩厥旨離騷無傷遠狝
沿至疑雨益扇靡風蘭音蕙怨一變而花魅脂妖矣夫
義喻者趣深辭蕩者志惑太牢好色謬奪單于之妃鶯
子證空弗入摩登之席審斯雅鄭判若朱墨僕蚤歲丁
厄閨過黃楊盛年殷憂剖徒白璞方昔秦川公子自傷
情多洛陽少年幾爲讒死過尤過之才不逮耳婦人之
泣不可壯夫之悔奚爲重以偏宕之氣故託優俳之言
工文奚益未免仲華笑人學道愁妨庶幾惠施知我

瓊華遙駐七香車芳草城南日又斜碧月幾時圓好夢黃金情
願鑄名花曲中絳樹春人怨洞口緋桃玉女家不分相思復相
別鬢絲容易感天涯

墨會靈簫定幾生芳犀脈脈復盈盈白描鴛翼疑無色紅懺蠶
絲尚有情金粟如來空說法玉卮孌子自呼名畫堂南畔聽春
雨第一銷魂是此聲

鵝盟鯽誓記恩恩依約銀灣路未通春水工愁名士鯽菱花吐
氣美人虹荒唐雲雨青樓遠颿泊鸞皇碧落空修竹蕭蕭愁日
暮越羅衣薄不禁風

香草前身總可憐空山誰與致纏絲愁生西月東星外人在南
花北雪邊蠟燭明明如此夜霓裳疊疊奈何天瑤池亦有三青
鳥不信東風只杜鵑

題河東君小影石刻

陪京風物十三樓苦向人間隻眼蒐山上蘼蕪山下柳一生搖

落一生愁

初心原要託黃門一局殘棋事莫論不種冬青種紅豆累人夫
壻太銷魂

答陳問渠上舍浩見贈之作次原韻

才名媿自說盧前回首飛蓬感鬢邊半榻閒銷雙屐齒一詩高
壓萬山肩衝冠意氣空磨劍呵壁文章不問天便向華峰尋玉
女西風十丈折紅蓮

蒲桃一曲換涼州款段從容馬少游但有狗屠同結客不妨蟲
達也封侯中年哀樂催鄰篋六代江山上選樓難得相逢賦招
隱天涯何必去悲秋

與陸樹齋豫夜話

故人重話剪燈紅此夕聞雞起舞同未必空山無泊鳳獨憐中
澤有哀鴻江湖滿地飛蓬梗書劍殘年走朔風曾是平生肝膽
共飲酣吐氣作長虹

校孫雪邨丈

思曾

遺詩感題一首

蘇門清嘯海雲邊酒俠詩豪老謫仙白社蓮華零舊雨青山鶴
骨冷秋煙兩朝玉節貞臣裔一卷金陀野史編祇我西華仍葛
屨感深文字倍淒然

別徐浩然

滄

尊酒忽言別落花相與愁風塵雙短鬢雲水一孤舟共此鳳鸞
嘯難爲鴻雁謀茫茫感人事春盡獨登樓

聽雪一首寄示陸蓉初

文健

幽人夜坐霜天屋，翠鳳翩跹弄修竹。瑤華一聲冷墜地，檐牙忽掛山中瀑。黃綾半臂擁薄寒，白板雙扉晨剝啄。冥冥古寺沈遠鐘，潺潺流水鳴深麓。苔痕凍沒屐齒折，乾葉戰罷木末禿。四山入畫，畫有聲。老鶴擎雲叫空谷，此詩聽之心茫然。江頭野老吞聲哭，安得吹上木棉枝。衣被蒼生，三冬煖草堂。高臥定如何。梅影橫窗，夏寒玉。

蓉初家有梅影草堂

宿周秋史

兆魚

齋中卽題其寶鴻仙館詩鈔

寒雨聲中坐此宵，把君詩卷當離騷。幽懷蘭草聞薌澤，慧語蓮花儼舌苗。銅柱功名人未老，玉顏涕淚酒能銷。贛洲漁唱知誰和，客有吳郎吹洞簫。

別唐竹筠孝廉

彥槐

忽忽別三載開尊一破顏憂時鳴古劍抱病入空山天地銷金
甲風霜老玉關著書還我輩歲月此中間

嘯古堂詩集卷六終

子同寅伯威甫校敬校